

Al è timp fin ai 25 di Zenâr

Vûstu imparâ l'inglês? Studie il furlan!

Passè il 76% dai gjenitôrs (dâts dalUSR) al à za dit di sî al furlan a scuele pai propriis fîs

Il 76% dai gjenitôrs, l'an passât al à dit di sî **al furlan a scuele** pai propriis fîs, daûr di ce che a mostrin i dâts dal Uffici Scolastic Regjonâl. Cualchidun al podarès domandâsi il parcè di cheste siele, fate in di di vuê, intun mont globalizât. La rispueste e je semplice: la cussience dai vantaçs cognitîfs, sociâi e culturâi di une educazion plurilengâl, cemût che e dimostre la ricercje sientifiche, e je simpri plui inlidrisade. Un esempi su ducj? **Un frut che al studie il furlan al impare miôr ancje l'inglês.** Di no trascurâ, po dopo, **une plui grande capacitât di aprendiment e une velocitât di comprension, plui abilitâts logjichis e matematichis e creativis, ma ancje di adatament, une viertidure plui largje par chei altris e pal mont e tant altri di plui.**

In Friûl, ducj i fruts a àn la oportunitât di imparâ la lenghe dal teritori in maniere naturâl. Tal moment de iscrizion ae scuele de infanzie, primarie e secondarie di prin grât, si pues sielezi l'insegnament dal furlan par dute la durade dal cicli scolastic: o fevelin di almancul 30 oris ad an, daûr di chê che a nivel european e je ricognossude tant che la metodologie didatiche plui efficace e ae avanuardie, o ben l'Insegnament Integrât di Lenghe e Contignût e cence gjavâ oris a altris materiis. La leç e previôt di fat che al jentri tal 20% dal curriculum individuât in autonomie des scuelis. La siele e ven fate tal moment de iscrizion sul portâl dal MIUR <https://www.istruzione.it/iscriziononline/> ma al è pussibil indreçâsi ancje ae segretarie de scuele par vê plui informazions.

Propit in viste de scjadince de iscrizion a scuele, ai 25 di Zenâr, par sclârî miôr i vantaçs di cheste siele, la ARLeF – Agenzie Regjonâl pe Lenghe Furlane e à realizât une **vuide utile: “Cressi cun plui lenghis”**, che si pues discjamâ dal sît www.arlef.it, insiorade de testimoniance di docents e di esperts impuartants, tra chescj Luca Melchior, linguist e professôr de Alpen-Adria Universitât di Claufurt specializât propit in plurilinguism. Dai dâts cjapâts sù al ven fûr cemût che un frut che al cres studiant il furlan al impare adore a lei, al dispon di une atenzion seletive plui grande e al passe cun plui facilitât di un compit a di chel altri. Ma no dome: il plurilinguism al jude la salût dal cerviel (che si manten zovin e elastic, ritardant i risis di demence e di Alzheimer) e al puarte in miôr lis oportunitâts pe vite private e pal sucès professionâl (i lavoradôrs plurilengâi a son plui ricercjâts e a vuadagnin di plui di chei monolengâi par vie des lôr competencis linguistichis e des abilitâts gjestionâls e relazionâls). Un altri aspjet di no lassâ di bande al è, po dopo, la impuartance di sostignî la siele ancje in famee. Ancje di chest e fevele la vuide che e ufris conseis une vore utii su lis strategjiis linguistichis plui justis di doprâ, tant che il metodi “une persone-une lenghe” (cuant che dome un dai gjenitôrs al sa il furlan, ogni gjenitôr al fevelarà al fi simpri e dome inte lenghe che al cognòs) e il metodi “lenghe de famee” (cuant che ducj i doi i gjenitôrs a san il furlan, a fevelaran al fi simpri par furlan, passant al talian dome cuant che al covente).

Udin, ai 15 di Zenâr dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Crucianti - mob. +39 335 6853775

<<<<<<<<<<<<<<